

李文忠公奏稿

李文忠公奏稿

卷之十四目錄

商河疊勝摺

同治七年六月十一日

張總愚負傷片

同治七年六月十一日

劉銘傳銷假馳赴前敵摺

同治七年六月十五日

豫軍濟陽獲勝摺

同治七年六月十八日

楊鼎勳請卹摺

同治七年六月二十二日

各軍追賊獲勝片

同治七年六月二十二日

運防楚軍奏獎摺

同治七年六月二十二日

張總愚全股蕩平摺

同治七年六月二十九日

查明張總愚實已投水淹斃直東肅清摺

同治七年七月初八日

請入觀片

同治七年七月初八日

請加恩從前督辦諸臣片

同治七年七月初八日

奏保袁保恆片

同治七年七月初八日

胡良作陳振邦請卹片

同治七年七月初八日

覆議凱撤南勇並籌西事摺

同治七年七月二十日

張總愚投水確寶並各軍裁撤片

同治七年七月二十日

劉秉璋乞病摺

同治七年七月二十四日

請蠲免東南積欠錢糧摺

同治七年八月初四日

請體恤吉黑馬隊片

同治七年八月初四日

餘賸軍米賑撫災黎片

同治七年八月初四日

東捻肅清彙案請獎摺

同治七年八月初四日

奏保倪文蔚片

同治七年八月初四日

銘軍暫紮張秋摺

同治七年八月初八日

請修曲阜孔廟片

同治七年八月初八日

會籌分別遣留各軍摺

同治七年十一月初十日

徐邦道請注銷處分片

同治七年十一月初十日

請假埽墓省親片

同治七年十一月初十日

李文忠公奏稿卷十四

全集一之十四

桐城吳汝綸編錄

商河韓勝摺

同治七年六月十一日

奏爲郭松林潘鼎新兩軍連日會合各軍追剿疊獲大勝恭摺仰
祈

聖鑒事竊五月二十八日以前各軍兜剿大勝情形臣於三十日
馳報在案郭松林會同東軍王心安於二十九日由陵縣進至臨
邑東南探賊竄往商河之李家坊三十日追及之郭松林先派親
兵馬隊誘敵賊騎回撲馬步伏兵盡起擒斬百餘名賊眾狂奔
民一帶時已薄暮郭松林傳飭各軍飽餐乘夜追襲行三十餘里
將近賊踞村莊派王心安襲前而賊館李長樂蔡國祥襲左面賊
館宋德鴻率右後兩軍襲右面賊館郭松林自督楊西平及唐仁

廉胡良作馬隊往來接應各軍挺刃而前見賊卽斫賊整隊不及四散潰走立奪所踞村莊十餘處武定附近湖地極窪擒斬及落水陷泥者無數將賊衝作兩起一由東北敗竄一由正北敗竄郭松林督仁毅與東軍馬隊農炊後向正北疾追七八十里沿途賊棄幼孩騾馬及脅從難民甚多直抵樂陵之劉村酷暑疲乏郭松林歎血舊症大發稍爲停頓查點各軍奪騾馬三千餘匹生擒髮賊千餘名李長樂生擒張總愚之姪張七張正江之弟張得華等立於軍前正法其竄正北一股被我軍追急迷路四散經民人截殺不少竄東北一股適張曜宋慶督隊由樂陵東進半途相遇一經壓擊賊卽敗遁追十餘里擒殺長髮一百餘名生獲裹脅二百餘人奪鎗械騾馬尤夥是夜分隊尋襲復擒斬數十名初二日清晨又獲零匪二十餘人初三日郭松林仍督隊向東北進追探賊

合股竄陽信之清豐鎮聞我軍追至又折而南初四日由武定之杜家橋竄過徒駭河郭松林卽緊躡過河該逆竄至濱州十八里之李子鎮正在圍攻民寨郭松林督軍猛壓而前先飭馬隊飛撲賊惶遽棄寨而走馬隊儘力衝突得保全民寨三處殺悍賊百餘截尾賊三百名奪騾馬三四百匹郭松林乘勝急追不稍鬆勁賊又折竄西非我軍追至夏家橋時已二更矣是日潘鼎新亦由陽信南來距賊甚近遂與郭松林會戰初五日賊方西遁已刻追及於馬店迤南賊被追窘迫拚死同拒鼎新馬隊滕嗣武率三營迎擊賊騎合力上犯往復十餘合鼎新步隊吳從發潘國揚張景春等各發伏兵連環並進郭松林督唐仁廉胡良作馬隊從左路抄出賊後李長樂宋德鴻蔡國祥步隊繼進賊屢回鬪悉經擊敗沿路拋棄騾馬婦女器械枕底河灘縱橫徧地郭松林等嚴令兵

勇不准搶拾一氣直追四十里至商河東非之于家圩烈曰炎蒸
人馬飢困暫就樹林憩息賊仍敢乘閒回撲復經胡良作馬隊截
擊生擒悍逆百餘名各軍乘勢合追至晚收住是日計斃賊一千
餘名賊目陳信元帶騎賊數十人乘夜來降潘鼎新收撫之初六
大雨竟日駐軍房家寨一帶賊亦在沙河左近未動初七日黎明
雨尙未止郭松林等會商曰雨潛師襲其不備兩軍排列並進行
十餘里甫過沙河賊方起隊未齊不虞我軍之突至也郭松林截
其前潘鼎新抄其後泥淖載塗賊騎難於馳突不得不拚命抵拒
我馬步各軍回環掩進無不以一當百奮勇爭先鎗子如雨矛簇
成雲賊大潰挫我軍乘勢壓追三十餘里伏屍遍野直抵商河城
下遇袁保恆由臨邑派去馬哨截擊之又擒斬三十餘人沿途敗
賊竄匿秫叢樹林閒及遺棄騾馬不知凡幾其大股脫逃者約尙

五千餘騎郭松林所部馬隊統領記名提督胡良作鼎軍步隊統領記名提督潘國揚均受重傷是役陣斬餘孽及擊散逆眾約二三千人生擒千餘名實爲非常快戰此五月三十至六月初七等日郭松林潘鼎新等軍先後會合追剿連獲大捷之實在情形也臣查捻逆屢挫之餘勢極衰蹙經郭松林等晝夜追剿該逆裹脅人馬拋棄殆盡兇悍老賊傷斃尤多惟其百戰死黨頭目敗帆騎駿馬先奔秫苗樹林徧地可以逃竄忽散忽合又忽爲困獸之鬬臣初患賊多難制今更患賊少難滅惟有恪遵

諭旨徧貼解散告示密布閒諜懸立重賞使之擒殺逆首以披其腹心並飭郭松林等仍會合皖豫東軍乘勝相機兜追輪替進擊勿令喘息冀可早日蕝事近值三伏炎蒸暑雨載塗軍士日馳百餘里飢苦疲病仍能用命爭先殊堪嘉憫所有追剿尤爲出力之

記名提督胡良作記名提督貴州安義鎮總兵唐仁廉可否請
旨敕部照一等軍功從優議敘記名提督潘國揚儘先提奏總兵
李長樂記名總兵吳從發張景春可否均請

旨另行存記遇有提督總兵缺出儘先簡放以示激勸出自逾格
恩慈再六月初一日以後黃河伏汛陡漲長江水師提督黃翼升
淮揚鎮總兵歐陽利見酒標記名提督姚廣武等各督所部礮船
陸續由張秋乘漲進口初十一等日已駛入德州運河北路運
防得此聲援當臻穩固臣會商黃翼升即酌帶船隻周歷東光南
皮以下察勘形勢妥籌分布相機策應合併附陳仰慰
聖廬所有郭松林潘鼎新連日會合各軍追剿悍獲大勝謹據實
由驛六百里馳陳伏乞

皇太后

皇上聖訓示謹
奏

張總愚負傷片

同治七年六月十一日

再正繕摺聞接潘鼎新專弁函報擒獲賊供初七日商河之戰逆
首張總愚自帶黑旗隊衝陣被我軍鎗傷落馬鎗子自背後穿小
腹而出賊以數十騎扛之而逃羣賊立即紛潰並據潘鼎新將陣
前所擒幼孩毛牛兒解送前來臣親提毛牛兒訊據供稱爲張總
愚表姪張三老瀾牽馬初七日正酣戰閒張總愚親兵馬隊圍稱
小閻旺腹受鎗傷甚重眾賊立時譁潰張三老瀾亦經洋鎗擊斃
是以乘閒逃出等語是張總愚受傷情形甚爲確實既係子穿小
腹似亦萬無生理郭松林函報亦稱是日賊眾潰亂非從前敗狀
可比該逆張總愚罪大惡極若果傷重致斃餘黨必即瓦解除飭
該統領等趕緊會合兜剿以期一鼓殲除並隨時查探確情具報
外理合附片馳陳伏乞

聖鑒訓示

奏

劉銘傳銷假馳赴前敵摺

同治七年六月十五日

奏爲賊勢日蹙各軍兜剿正緊劉銘傳遵

旨回營銷假卽飭帶隊馳赴前敵督剿恭摺仰祈

聖鑒事竊初七日以前臣軍追剿疊獲大捷逆酋張總愚受傷各

情經臣於十一日馳報在案賊股敗衄後山商河迫入濟陽東北

黃河沿之鄆家渡龍王廟一帶連日大雨滂沱平地水深二三尺

徒駭河與黃河水勢增漲賊所盤踞之處地形略高以外一片水

窪潘鼎新吳長慶由米家橋進張曜宋慶由林家橋進袁保恆郭

松林會同皖軍張得勝程文炳東軍王心安由多石橋進皆由徒

駭河北岸崑渡而前冀蹙之水濱爲一鼓聚殲之計頃據袁保恆

潘鼎新馳報我軍搜捕散匿之賊疊有斬獲張曜宋慶於十一日

帶隊先至林家橋繞出賊前攔擊已獲大勝郭松林潘鼎新張得

勝程文炳等均乘夜進兵兜追又據潯鼎新十三日午刻函稟據
擒賊供稱張總愚自初七日受傷以後甚爲窮迫徒駭河沿岸村
莊見有縊死長髮老賊並自燒馬匹者其慌亂情形可想臣飛飭
各統領乘此賊勢窘蹙合力兜剿趕緊窮追務期悉數殄除勿留
餘孽適劉銘傳臣與曾國藩等疊次緘催先於五月十六日自
皖啟程六月初八日行抵東昌銘軍老營昨來德州晤商機宜據
稱仰蒙

朝廷不次之擢

眷顧之隆亟思感激報效初因骹創大發寸步難移嗣調治稍痊
卽力疾就道抵營後聞我軍已屢獲勝似無須該提督出勦等語
惟前奉五月初四日

諭旨飭臣傳諭該提督迅赴前敵督隊剿賊以副終始成全之意

現在賊勢日蹙事機正順該提督威望素著自應迅速前進會合各軍加勁追剿以作士氣而速成功因檄調該提督原部各馬隊並酌抽銘軍精銳步隊由劉銘傳統率即日馳赴前敵相機督戰其圖壩蕩仰慰

聖廬除各軍獲勝情形續行詳奏外所有賊勢日蹙各軍兜剿正緊劉銘傳回營銷假卽飭帶隊馳赴前敵督剿各緣由謹繕摺由驛六百里馳陳伏乞

皇太后

皇上聖鑒訓示謹

奏

豫軍濟陽獲勝

同治七年六月十八日

奏爲豫軍張曜宋慶會合各軍在濟陽東北黃河徒駭河之間兜
擊捻賊大獲勝仗賊屍水逃竄直奔吳橋德州交界搶撲運河
被水陸各軍擊退擒殺降散極多現督各軍緊追恭摺仰祈
聖鑒事竊捻股遁入濟陽黃河沿各軍由徒駭河南進兜擊張曜
宋慶已獲大勝緣由經臣於十五日馳報大略在案先是初七日
該逆由商河敗遁濟陽以北三十里之鄭家渡曲里集一帶該處
在黃河徒駭河之間張曜宋慶與潘鼎新兩商即緊靠賊西取道
東北擬繞賊北進剿十一日行抵郭橋柳橋二更時忽見買橋徒
駭河西火起該逆由東南竄來宋慶飭李承先率隊過河迎剿踏
毀賊踞村莊兩處擒斬二百餘名獲騾馬二百餘頭該逆卽連夜
向北狂奔宋慶督隊且攔且追張曜亦乘夜由郭橋過河截剿十

二日清晨抵崔寨馬莊一帶適該逆自南而北立卽分投剿捕泥水沒膝騎賊無所爲計擒斬二三百生獲賊目鄭文起一名得馬三百餘匹該逆遂折而南遁撲入黃河沿之老海窪宛水向正東逃竄宋慶亦分路馳渡過窪向南進擊張曜由王盤向東進擊潘鼎新緊靠窪西追剿張逆竄過老海窪卽循黃河向東北走適與張曜相值張曜督各營奮力剿殺匪勢不支敗回西南仍循河遁走宋慶馳抵河沿將該逆攔頭截住賊眾情急下馬拚命衝突宋慶督領奮勇分投剿擊來往激決酣戰半時賊復大敗張曜仍循河岸如牆截堵該逆慌亂無路逡巡撲至林鎮鴻福寺適在黃河曲處四外全是水坑兩軍殺入其撲河投水死者坑溝俱塞擒賊僉供張逆先已中鎗死黨數十人屍渡而走當查宋慶所部生擒偽天將何光俊一名並擊斃花旗著名賊首楊恩楊照悍酋張

元等張曜所部擊斃著名賊首程二老坎程三老坎張錦泗周六均已查獲賊屍確實無訛大小賊目死者甚眾因兵勇衝亂屍橫遍野並死於河坑者無從尋認計是役擒斬淹斃賊夥約六七千名獲騾馬近萬匹該匪不械輜重拋棄殆盡宋慶所部傷亡奮勇三百餘名張曜傷弁勇五十餘名此張曜宋慶兩軍十一二日大獲勝仗殲擒多賊之實在情形也是日賊經豫軍擊敗沿徒駭河西南走適郭松林與東軍王心安皖軍張得勝程文炳先後由多石橋兜進臣派翼長袁保恆由臨邑馳往會商據袁保恆面稱十三日該統領等督隊晝水前進張程偏北郭王偏南是夜五更賊已闖至各軍馬隊先與賊遇郭松林王心安整隊向東北衝擊賊即向西亂竄黑夜中不知斃賊多少比黎明各營除追殺外生擒二百餘名郭松林等當即跟蹤向西追剿其正東一路張得勝先

與賊接仗擒眾驚竄闕至程文炳隊內奮力轟擊斃賊甚多並將其後隊截斷各處迸散生擒數百名收降百餘人袁保恆派馬哨探亦有擒獲十四日辰刻各軍追過七石橋西二十餘里賊復折而北向由王莊搶渡徒駭河郭松林張得勝等趕至獲落後馬賊數十名賊由新大莊直奔臨邑東非是日善慶溫德勒克西正由臨邑拔隊南進半途邀擊頗有擒斬又先派周盛傳吳長慶兩軍由德州吳橋分路南下以備夾擊吳長慶十四日趕至距臨邑三十里暫駐探賊北來十五日冒雨橫出德平交界之美鎮賊正在該處造飯吳長慶將步隊埋伏樹林中而以馬隊誘敵賊整隊來迎當經葉志超楊岐珍衝殺數合斃賊數十奪馬二百餘匹勇丁傷亡三十餘名步隊繼進排鎗環擊賊即敗退生擒賊目張正士石光鑾二名餘黨及幼孩百餘名此十四五日各軍追擊獲勝

之實在情形也十六日已刻賊已連夜由德平甯津之交越吳橋而至德州之桑園吳長慶尙留二成隊在桑園防守運河間賊北竄甚急亦由德平連夜隨賊而北賊甫離桑園六七里營內小隊突出攔剿賊不知我軍多少折向西北運河邊撲竄有騎賊二十餘名先到高家店渡口冒充官兵喚渡經西岸守牆民團及提督徐道奎所部礮船識破立即開礮沿河奮擊賊大隊繼至紛紛赤身渡幸河水陡漲一丈五六尺師船左右轟打團勇對施鎗礮斃賊二十餘名馬百餘匹生擒四人吳長慶復派隊在後追擊擒賊百餘奪馬二百餘匹賊始潰退午後復往德州以北五十餘里之第二屯老君堂一帶搶渡又經礮船奮力擊走臣在德州聞信立派總兵歐陽利見鄧萬林各帶礮船下駛接應臬司張樹聲道員李逢春等飛調景州民團全隊上牆連夜堵擊該逆在河東岸

上下數十里內盤旋竟夕周盛傳吳長慶均帶隊由東北兜追臣
 派親兵小隊道員周世臣總兵張樹屏由德州夾攻劉銘傳復調
 銘軍馬隊乘夜進襲是夜周盛傳攻奪賊踞村莊數處收降賊目
 張九臨數百人周世臣等收降著名頭目張正邦張正位張可師
 尹瑞成等六百餘人錦軍馬隊收降邱麻子夥賊二百餘人周盛
 波收降李老懷夥賊八百餘人臣因其窮蹙乞命分別遣留十七
 日清晨餘眾仍向德平一帶竄遁周盛波周盛傳郭松林張得勝
 等均督隊分路緊追此十七日捻賊直奔吳橋德州搶撲運河經
 水陸各軍擊遏收降之實在情形也臣查賊在運東竄擾將近四
 月其初民無圩寨遍地擄糧各軍布置防務未及遠追痛剿賊勢
 尚未窮蹙從不肯猛撲運河張逆素多詭智蓋恐撲渡不遂即眾
 心易離也自馬頰河及陵縣臨邑橫牆築成各縣鄉民又多築圩

自保伏汛雨水泛濫武定東昌以南平地皆水竄路漸狹撈糧亦
難臣於此時不敢過恤兵餉商催各軍團營忍飢晝夜苦追倖賊
獲捷賊技稍窘遁入濟陽水套不虞張曜來襲幸軍晝水而前就
地壁射遂獲奇捷聞十二日之戰該逆輜重軍械老弱眷口騾馬
遺棄過多程二老坎邱麻子死黨悍目多斃於水元氣大傷是以
情急晝水數重日馳百數十里趕至運河拚命猛撲臣親訊降賊
頭目僉供張總愚前此受傷實不致命昨至運河邊該逆猶首先
策馬下河無奈水深溜急礮子如雨眾賊畏阻不從張逆欲白尋
死經其兄張宗道勸阻痛哭而返眾賊見運河不能搶過官軍勢
盛內生攜貳是夜卽先後赴臣營投降共二千餘人現計該逆死
黨惟存張宗道張宗先張正江數隊人馬皆其親屬人愈少則糾
結愈固與東股任賴等逆糾聚數省之人勢盛則合勢衰則散者

情形稍異張總愚決意避兵亂竄自稱走一日卽活一日各軍追
剿若不趁得地勢及月圖內間似尙非一二仗可了臣等惟有及
時相機圖之冀速殲滅仰慰

聖廑張曜宋慶轉戰日久軍士勞苦倍常此次奮其疲勞出奇兜
剿竭一晝夜之力出入泥淖中獲此大捷營哨各官爭先用命據
該統領等稟懇立予奏獎以示鼓勵臣距該軍較近不敢壅於上
聞謹照來單核實繕開清摺籲懇

聖慈可否准照所請給予優獎俾作士氣而收全功至防守運河
水陸各營及西岸景州紳團協力堵剿擊退悍逆保全大局可否
由臣查明出力員弁彙案請獎出自

恩施所有豫軍大獲勝仗及各軍兜追該逆搶撲運河擊退降散
仍督軍緊追各緣由謹由驛六百里據實馳陳伏乞

皇太后

皇上聖鑒訓示謹

奏

楊鼎勳請卹摺

同治七年六月二十二日

奏爲提督大員戰績卓著在滄州減河防所因病出缺懇懇

加恩優卹並揀派熟悉勦軍營務大員暫行代統該軍以重防務

恭摺仰祈

聖鑒事竊湖南提督楊鼎勳四川成都人自咸豐初年從軍湖北安徽等省嗣隨提督鮑超營中帶勇立功洊升游擊臣於同治元年二月募軍東下遴選驍勇知名之士檄調該員隨往上海委帶勦字營淮勇疊次攻克松江嘉興各屬縣城蘇州省城常州湖州各府縣城同治三年三月間與逆偽護王陳坤書擁眾數萬死守常州於西南門外通丹陽金壇之路連營二十餘里堅壘重壕屢攻不下臣親往督師派楊鼎勳統帶所部進紮前敵約會諸將同日猛攻賊憑河據險鎗礮尤密將士肉薄靡壘者傷亡枕藉屢進

屢卻楊鼎勲親執旗鼓躍濠先登被賊擡鎗子洞穿胸脇倒地軍士一擁而上始將該逆頭營攻破其餘賊營數十座次第踏平常州堅城越日攻克踞賊悉數殲除實以楊鼎勲爲首功惟其受傷太重死而復甦臣爲延西洋醫士調治服峻劑年餘創雖收口胸中淤血積成痞塊遂爲銅疾四年春粵逆竄擾福建漳州等處軍情緊急奉

旨飭調蘇軍赴援臣因楊鼎勲可當一面所部稍單奏派該員會同福建提督郭松林統軍由滬航海赴廈門登岸逾月連克漳州府及漳浦縣城閩省肅清五年調往山東河南勦辦捻逆屢獲勝仗六年秋冬之交扼守運河圍困任柱賴汶洸等股維時勦兵甚單不足制賊死命勦軍馬步僅十營臣調他軍併隸之檄令會合劉銘傳郭松林等縱橫兜擊不數月而任賴全股以平七年正月

西捻張總愚等突竄畿疆奉

旨徵調援軍楊鼎勳傷病甫發所部將士久戰疲勞仍白請力疾督隊從臣北征忠盡之忱溢於詞色二三月間逐賊饒陽深州滹沱彰衛之閒所向披靡四月初賊由東昌渡運直奔天津楊鼎勳會師晝夜冒雨急馳繞攔賊前津郡圍解該提督病勢亦漸加矣其時通商大臣崇厚與臣議就運河圍賊先以嚴扼滄州減河保固津畿門戶爲要臣於四月杪馳往減河察勘地段甚長非宿將重兵不足控制面商楊鼎勳留駐減防妥爲布置並臧請崇厚添兵協助嗣是賊屢撲犯均未得逞該提督親率將士修牆浚濠日無停趾積勞之餘傷病增劇崇厚由津遣醫診視五六月間病已小瘥臣屢專弁往看聞其料理防務日加嚴密心竊喜之忽據勳軍各統帶官稟稱該提督於六月十五日肝氣上衝嘔血數升延

至十六日卯刻竟爾出缺臨歿之際猶集各統帶官提督王萬釗等諭之曰鼎勳提一旅之師轉戰九省渥蒙

聖朝知遇不數年間由偏裨洊任專閫方冀病愈帶隊出勦平殘寇以報

國恩今此志未遂死有餘恨言訖而終並無一語及私等因臣聞信之餘曷任痛悼當派軍營務處道員段喆馳往減河爲該提督照料後事並會商勦軍各統帶官整理防務仍舊嚴守查勦字全軍步隊十五營馬隊三營向派委員分統每人各統三營由楊鼎勳總統節制其統帶及營哨各官均隨軍有年戰守尙爲可靠內有統帶勦前軍之記名提督王萬釗老成穩練熟習軍情楊鼎勳病重時曾託王萬釗主持一切堪以委令暫行代統勦軍會督各統帶籌辦減防可無貽誤臣仍隨時會商都興阿崇厚等督

令各守汛地互相策應務保無虞仰慰

聖鑒臣復查楊鼎勳智勇忠勤久歷戎行能輯和將士知大體精習外洋火器於練兵制敵方略別具會心故戰勝攻取積功最多實爲一時名將年甫三十有四遽以重傷久勞致嬰沈疴歿於軍次家有八旬老母並其遺孤應襲騎都尉世職楊萬凱現僅四歲流寓蘇省欲歸未得尤可慘傷合無仰懇

聖恩准於該提督立功地方江蘇福建山東等省建立專祠特旨予諡將其戰功事蹟

宣付史館立傳伊子楊萬凱可否俟年及歲時由吏部帶領引見聲明請

旨加恩並

敕部照提督軍營病故例從優議卹以彰忠藎所遺湖南提督員

缺應請

旨迅賜簡放所有提督大員戰績卓著在滄州防所因病出缺懇恩優卹並揀派熟悉勦軍營務大員暫行代統該軍以重防務各緣由謹繕摺由驛馳陳伏乞

皇太后

皇上聖鑒訓示謹

奏

各軍追賊獲勝片

同治七年六月二十二日

再擒逆張總愚自十六日猛撲德州以北運河經水陸各營擊退收降二千餘人臣已奏報在案十七日賊由德州陵縣境內逃竄周盛波挑帶馬步小隊三百餘名橫出章家寨突擊之賊駭而奔吳長慶派馬隊三營緊蹙賊後皖軍程文炳亦督隊追至張總愚整隊回拒往返衝壓十餘合程軍小卻吳長慶馬隊埋伏樹叢中吶喊齊出下馬持矛撲殺斃賊無算賊向東南奔竄郭松林追抵陵縣先後收降賊目王有志羅志安等三百餘騎十八日會同善慶等追至林古莊搜殺百餘賊是夜有賊酋張小辨子帶二百餘騎來降十九日張得勝程文炳追至商河西遇賊於兩湖之濱張逆率眾拒敵程文炳馬步涉水進戰殺賊二百餘名收降百餘人賊又折走東北袁保恆帶小隊進駐德平之義渡口派魏林起馬

隊探賊沿途擒獲零散騎賊數十人訊稱張總愚所部各頭目大半投降僅贖張宗道張宗先等兄弟相隨賊黨精悍無多等語又據侍衛陳國瑞呈稱十二日在濟陽之高橋接仗生擒百餘賊十三日偽淮王邱遠才率八百餘騎來降該侍衛令其帶罪立功現亦向東北追剿近日黃水盛漲灌入運河德州東光南皮境內東岸衝塌缺口三處運水分由平地漫溢入海雖農田秋穀微有損傷而東北一帶賊騎亦多限阻不獨爲滄州減防之屏蔽追軍就地盤剿更易得勢劉銘傳抽調馬步漸齊卽日進兵會合各軍兜追除續後軍情再行馳報外所有近日追剿獲勝情形附片馳陳伏乞

聖鑒訓示謹

奏

運防楚軍奏獎摺

同治七年六月二十二日

奏爲上年調派運防楚軍仁勝忠義等營堵剿出力在事水陸員弁遵

旨查明專案彙保仰祈

聖鑒事竊自上年五月東股任賴等逆竄過東省運河其時臣軍有進剿之兵無設防之兵奏調鄂軍越境協守爲蹙賊運東之計前署湖廣督臣李瀚章前湖北撫臣曾國荃因派楚軍記名提督譚仁芳劉維楨馬步二十餘營兼程前進正值暑雨行潦豫境平地皆水該軍弁勇跋涉遠來踴躍用命譚仁芳守自東平州靳口至開河五里鋪一帶劉維楨接防至濟甯西圩外一帶李瀚章等又檄總兵丁長春健捷營水師由長江下駛繞淮入運會同陸軍節節布置毫無罅漏俾前敵兜剿諸軍一意殺賊無迴顧牽掣之

虞其後路辦理支應護運餉需均屬異常出力上年十二月任賴
全股殲滅經臣奏准查明各軍出力人員一體保獎遵經分行各
統領核實開單逕呈本省督撫專摺奏保去後本年二月署督臣
李瀚章調任浙江巡撫護撫臣何璟接辦軍務未久仍移交臣就
近核辦前來伏查譚仁芳劉維楨兩軍向爲鄂省勁旅遵調到防
之日卽自請率師游擊營滅此賊臣以爲非扼守運河則進剿無
益當飭其分段築牆浚濠晝夜扼堵該逆自八月以後屢竄克濟
冀圖撲運蓋其處近接戴家廟一帶爲前此偷渡運河熟徑河水
又極淺涸故百計繞越窺竄以求生路賴譚仁芳劉維楨布置精
嚴又時出行隊就近迎擊前後俘斬巨酋甚眾賊不敢犯而東岸
上自馬踏湖至蜀山湖下自長溝至馬場湖三十餘里陸路要衝
挖成長濠六七月之久軍士無片刻休息賊遠則日夜潛築賊近

則神速指揮巡防勞瘁有裨全局今東股幸已戡功該軍已凱撤
回省臣未敢沒其勞績相應繕具清單仰懇

天恩准照所請以資激勵除千總以下各弁照案咨部核辦外所
有上年調派運防楚軍各營堵剿出力員弁彙保緣由謹會同署
湖廣總督湖北撫臣郭柏蔭護理湖北撫臣何璟恭摺由驛具陳
伏乞

皇太后

皇上聖鑒訓示謹

奏

張總愚全股蕩平摺

同治七年六月二十九日

奏爲連日督軍追剿屢獲大勝逆首張總愚率眾由臨邑西趨自投絕地經劉銘傳郭松林選帶馬隊會合各軍步隊就勢兜圍據劉銘傳等馳報六月二十八日已在平南鎮一帶將西捻張總愚全股蕩平先將大概情形專摺馳報仰慰

聖廑事竊各軍疊次大捷賊勢衰蹙降散漸多經臣等馳奏有案旋據劉松山稟報十九日探知賊竄商河樂陵之交二十日帶隊趕到賊卽向北潰奔追二十里擒斬約二百餘名未刻又追二十餘里賊踞鹽山之保和寨劉松山於是夜初更進剿將賊衝爲數起搜殺數百該逆向西收走天明時於高梁中搜獲長髮百餘名花旗頭目周祿帶馬賊二百餘人來降復向西進追至滄州之陳古村等處該逆又向西南逃走截殺三四百名又據潘鼎新郭松

林稟報二十一日賊由德平南竄郭松林是夜派青雲馬勇襲破賊館一處獲老捻數十名騾馬五十餘騎郭松林卽督隊繼進二十二日天明抵盧塞及之賊眾拚死拒戰潘鼎新陳國瑞張得勝等均經趕至各有擒斬追三十餘里逆酋羅大率敗賊三百餘騎來降郭松林收之仍追過德平西南十五里賊忽折向東南各莊屯息仍敢馳馬回犯郭松林與善慶溫德勒克西分東西迎擊賊亦分兩路猛拒潘鼎新帶步隊由秫叢中分道截擊賊遂狂走生擒鎗斃約百人是日郭松林潘鼎新陳國瑞先後追抵商河二十三日張逆涉水向西南逃竄二十四日已由平原向高唐二十五日潘鼎新追百二十里冒雨至高唐聞賊已向博平清平一帶圖撲運河幸東昌臨清張秋間河水深各營嚴守賊不敢近又馬頰河黃水漫入先經臣與丁寶楨嚴飭該官紳於河西北岸聯築

長牆數百里足限戎馬賊方訶知入我穀中竄地逾狹死期將近矣臣於二十二日奏明派劉銘傳調齊馬步即日進追誠恐各軍久追疲乏得此生力馬軍助戰或可酌就地勢一兩仗了之二十五日劉銘傳郭松林山陵縣會師南追袁保恆亦同往聯絡豫皖各軍二十六日馳抵高唐賊仍向西南竄走臣正深焦盼聞頃據劉銘傳郭松林二十八日午刻在在平縣之南鎮行陣中草書數百言專弁馳遞德州內稱二十七日賊由博平向東昌迤南李海務竄撲河牆當經守軍擊退劉銘傳等議於徒駭河沿河橋口紮住劉銘傳步隊由桃橋守至南鎮郭松林步隊由桃橋守至博平袁保恆往博平約會宋慶張曜由博平守至東昌將賊圍在徒駭黃運之間庶馬隊可就地兜逐二十八日早賊由西向東回竄劉銘傳當卽調集馬步迎擊該逆且戰且走追剿數里值郭松林東

來馬步全軍攔住去路又兼河道分歧水溜泥陷劉銘傳郭松林兩軍馬隊五六千人縱橫合擊大股賊匪全數擒斬張總愚僅帶數十騎北逃馬勇追上該逆聞已棄馬遁入高粱叢中又聞有投水淹斃之說劉銘傳當派鄧長安率馬隊四路兜尋尙未回報張總愚之愛子張葵兒被郭松林所部擒獲並拏頭目甚多尙未細查張總愚之姪張正江率數十騎逃至南鎮正遇劉銘傳所派駱國忠左右兩軍堵住拏獲極多約共生擒老賊三四千人驛馬儘數奪獲詳細捷狀容卽查明續報正西稟聞善慶溫德勒克西追殺已回據稱賊已報盡各等語前來臣面詢劉銘傳善慶等兩起所派吉林黑龍江官兵均稱未初由彼啟程戰事已畢四外並無游騎惟恐有悍目餘黨逃伏枕叢中現派馬隊搜剿各路官兵均正搜捕餘匪劉銘傳等並令降賊素識張總愚面貌者懸立重賞

四處購求無論死是生務得確實下落該逆本在運河圈套之內現在河水極漲各處防軍嚴密皆欲得而甘心斷不容其漏網張總愚本有勢窮卽自尋死不肯顯受刑戮之說其投水淹斃似尙可信除俟有確實下落再行馳報所有各軍防剿出力人員及防河團練擬請

恩旨飭下該統兵大臣及各督撫自行核實次第保獎其獲捷情形並各詳細具奏外所有督軍連日追剿屢獲大勝逆首張總愚率眾由臨邑西趨經劉銘傳郭松林會合各軍就勢兜圍全股蕩平先將大概情形由驛六百里加緊馳陳仰慰

聖座伏乞

皇太后

皇上聖鑒訓示謹

奏

查明張總愚實已投水淹斃直東肅清摺

同治七年七月初八日

奏爲查明逆首張總愚實已投水淹斃現得有降賊確供各軍搜捕餘匪淨盡直東境內一律肅清恭摺馳陳仰祈

聖鑒事竊官軍會剿捻逆全股蕩平業將大概情形馳奏在案先是張逆率眾於六月二十六日圖撲東昌一帶運河經丁寶楨督軍擊退是日午後由豫軍馬德昭防段直奔西南該逆偵知劉銘傳已調六成步隊出剿銘軍所守李海務以下地段過遠防軍甚單卽於是夜初更大股分撲李海務周家店等處河牆道員丁壽昌趙宗道提督劉克仁總兵劉朝幹等嚴督守兵暗伏不動俟該逆衝至運河外濠連施鎗礮逆猶不退經開花礮彈轟入賊叢始退踞河東村莊丁壽昌等復派提督劉盛瑊總兵丁達材帶隊出襲賊館擒斬甚眾該逆奔向西南又於四更後猛撲七級北河牆

歸水競渡劉克仁督軍並擊斃賊無算趙宗道趕至接應賊乃敗遁二十七日潘鼎新率隊由東昌迎截黎明過陳家口十餘里收降李志明等二百餘人據供竄運不能卽折回東北午後過陳家集及賊於沙河逆眾拚死回拒我軍併力壓剿追至在平所屬之廣平鎮二十八日潘鼎新張曜宋慶等軍由在平西南兜追沿途擒獲甚夥張總愚率其死黨銳向北面竄逃適劉銘傳郭松林善慶溫德勒克西馬步各軍攔頭截擊並先將徒駭河各橋口分隊扼紮斷其去路各軍四面圍剿擒斬殆盡其戰狀前已備陳嗣據劉銘傳郭松林查明張總愚之兄張宗道其弟張宗先姪張正江及其族人張元卽平頭王並賊中帶隊頭目陳大老坎三老坎四老坎馬老三樊大等均於陣前擒殺惟據擒賊供稱張總愚於亂軍中先帶數十騎逃走經官軍追急餘賊潰散該逆僅帶八人向

東北桃叢中走去劉銘傳等派隊四路跟尋杳無蹤跡當令道員
余恩樞率同淮軍各馬隊搜捕餘匪附近各州縣尋覓殆徧數日
以來已無一賊但聞民間紛傳張總愚投水淹斃旋據統領豫軍
張曜稟稱該營續收降賊王雙孜供稱是日實隨張總愚逃至徒
駭河邊親見張總愚棄馬投河淹斃當飭將王雙孜解送德州臣
督同候補京堂袁保恆等親提訊問據供跟隨張逆九年二十八
日之敗張逆帶小兵八人逃走王雙孜卽在八人之內張逆自稱
罪孽已重無可求生先欲逃過黃河無奈黃水漲漫萬不能近走
至徒駭河濱勸令隨從七人各自逃命張逆卽下馬脫衣投水而
死等語臣再四研訊王雙孜人尙老實所供張逆投河時情節語
氣歷歷如繪證之各營降眾所稱張總愚平日屢說事急必自尋
死不肯顯受刑戮亦屬相符是其投水伏誅毫無疑義惟刻下黃

水盛漲灌入徒駭深不見底事隔多日該逆屍身隨水漂流必已腐爛無從尋認謹照鈔王雙孜供詞恭呈

御覽仍將該降人羈留在營備質各處逃匿餘匪業經搜捕淨盡並無一名漏網各路官軍均已撤回原營暫行休息再陸續凱撤回省臣伏查捻逆倡亂十數年流毒數省去冬任賴等股幸就削平不圖張總愚渡河北竄震驚

畿輔仰累

宵旰憂勞徵兵籌餉日昃不遑皆緣臣等督師無狀致此疏虞負咎滋甚四月間賊竄運東臣稔知流寇非圍制不行因與左宗棠官文崇厚英翰丁寶楨等議就直東運河滄州減河圍築長牆欲趁伏汛盛漲時壅地穴滅其時地震兵單有勦無防經臣咨商官文揀派直隸臬司張樹聲道員歐陽正塘督飭沿河民練修守長

將丁寶楨亦派道員王成謙接修東境河牆直屬團練修守本境及協濟東境者工費最鉅全局有裨六月十六日張逆率眾猛撲景德之交幸獲保全臣又商同丁寶楨督勸民團就馬頰河西北岸至陵縣臨邑一帶聯築牆濠作爲裹圍該逆被創勢窮南遁自投羅網各軍乘機緊追就地兜剿遂得迅速殲滅都興阿左宗棠及臣等始願皆不及此實賴

聖主鴻福

廟堂決勝於上神機營戰諸王大臣控制於中各省將士奔走效命於外乃使跳梁小丑迅就蕩平爲中原軍務一大結束微臣躬在行間獲睹

昇平愧無絲毫補助祇有私衷慶忭而已所有剿賊最爲出力人員謹先核開清單懇

恩准予優獎餘俟查明彙案分別奏獎所有逆首張總愚實已投
水淹斃各軍搜捕餘匪淨盡直東境內一律肅清各緣由謹繕摺
由驛六百里加緊馳

奏伏乞

皇太后

皇上聖訓示謹

奏

請入覲片

同治七年七月初八日

再軍事大定所有安插降眾裁撤營勇各事宜自須次第妥籌辦理擬飭所部各軍漸移南下以便就近招撫惟臣自咸豐三年正月奉

文宗顯皇帝派往軍營團練防剿嗣由編修升外任歷蒙我

皇上不次之擢計五年蘇撫兩署江督再調楚督臣固未嘗一日

不在軍中祇緣兵事餉事責任繁重每於奉

命拜官之時不敢循例請

觀瞻戀

闕廷夢魂飛繞茲值中原奠定微臣解甲有期犬馬戀

主之誠不能自己可否容臣將行營緊要各事料簡粗畢即輕騎

馳赴京師恭覲

天顏跪聆

聖訓俾一切得有遵循如蒙

俞允臣軍有劉銘傳郭松林潘鼎新等各統將在營會商照料斷可放心俟臣由京回營再與曾國藩丁日昌會商籌借餉需陸續

遣撤現在卿捻事竣所有臣原領

欽差大臣關防一顆應否由臣齎京恭繳之處伏候

皇太后

皇上聖鑒訓示遵行謹附片具

奏

請加恩從前督辦諸臣片

同治七年七月初八日

再捻逆倡亂已歷十數年雖未多據城池其善攻善守亦不及粵匪而剽悍善戰實過之從前督辦諸臣如前

欽差大臣僧格林沁袁甲三等皆疊次堵穴擒渠戰功卓越雖未克悉數蕩平其滅賊之心久而愈奮今在事各軍馬步多係該前大臣等舊部愴懷遺烈莫不感激涕零至現任大學士兩江總督曾國藩接辦年餘謀定後戰雖未立見速效而長牆圍制之策實已得其要領臣得變通盡利以竟全功實自曾國藩開之且自回任後事事與臣和衷共濟籌餉籌兵不遺餘力忠懇之誠無閒去留現幸仰託

聖主威靈中原底定可否分別

加恩以慰忠藎此外凡勦捻以來文武大員沒於王事者可否

飭部查明一律

推恩用廣

皇仁而作士氣出自

皇太后

皇上迺格鴻慈臣愚昧之見是否有當伏乞

聖鑒訓示謹附片具

奏

奏保袁保恆片

同治七年七月初八日

再候補鴻臚寺少卿袁保恆奉

旨飭交臣營差委當以該京卿熟悉軍情派充臣處馬步全軍翼長會商前敵諸將妥籌防剿近月以來冒督隊逐賊奔馳聯絡淮豫皖東各軍同心努力親若弟兄遂得迅速肅功於大局實有裨助該京卿忠懇耐勞文武兼資察其才識允堪大用可否仰懇聖恩開復袁保恆前次降調處分仍以翰林院侍講學士原官補用抑應如何

加恩之處伏候

聖裁謹附片具

奏

胡良作陳振邦請卹片

同治七年七月初八日

再統帶武毅軍馬隊記名提督剛安巴圖魯胡良作湖南郴州人
歷隨曾國荃鮑超征剿江西皖鄂等省戰功綽著上年隨郭松林
北來派統武毅馬勇五營馳剿直豫東三省每戰皆捷六月初七
日逐賊商河該提督督隊衝鋒斃賊甚眾不意身受鎗傷子山左
肋入腹醫治無效於十八日身故據郭松林呈請

奏卹前來又據劉銘傳呈稱前統帶銘軍馬隊記名提督陳振邦
本年三月在河南滑縣剿賊陣亡業蒙奏奉

諭旨從優議卹惟該故提督少年英勇矢勤矢慎戰必爭先東股
任賴等逆馬賊最悍獨該軍可與力敵馳剿數省立功最多請俯
念前勞籲懇

加恩等情

臣查剿捻以馬隊爲最要亦惟騎將爲難得陳振邦胡

良作兩翼轉戰無前實騎將之上選乃因忠勇奮發先後死事陳振邦剿東股胡良作剿西股皆極得力今大功幸賊追思猛士益增怛傷自應各從所請仰懇

天恩准將記名提督胡良作

敕部照提督陣亡例從優議卹

特旨予諡並於湖南原籍建立專祠記名提督陳振邦請再加恩賜諡並在江蘇清河縣寄籍建立專祠以彰忠肅謹附片陳請伏乞

聖鑒訓示謹

奏

覆議凱撤南勇並籌西事摺

同治七年七月二十日

奏爲欽奉聖次

諭旨恭摺陳仰祈

聖鑒事竊奉

寄諭以崇厚英翰所陳善後各條令臣等妥速議奏查崇厚前奏體恤將領擇養驍健選拔西征三事業奉六月初七日

諭旨飭准照辦當經傳知所部將弁兵勇無不踴躍歡呼用能剋期滅賊嗣奉七月初五日

寄諭鈔示英翰所奏各條內稱裁撤直隸練軍留勇扼紮一節接准官文函稱宣化練軍地居獨石張家等邊口遵化軍則

東陵重地且近接邊關保定軍則省會要區屏蔽近畿擬於此三處汰弱留強未敢悉議裁撤至南勇久戰之餘誠爲勁旅但慮直

民愚蠶或未能耕鑿相安等語似係老成慎重之見臣愚以爲兵丁之不得力非獨直省爲然軍興幾二十年其初調兵多而募勇少而賊勢日猖厥後去兵用勇規制一新粵匪捻匪次第削平功效大著蓋由綠營習氣太深分布太散兵丁大半驕惰將弁又不一心勇則募自田野多樸拙困苦之人統領營哨各官自行挑選一氣呼應易於效命惟有事之時募勇以救急應變無事之時練兵以緝盜安民是皆不可偏廢欲化弱兵爲強兵立法與用人二者不可不大加變通目下軍事大定勇丁逐漸裁撤各省綠營漸復舊規必須及時整頓

畿輔拱衛關繫尤重若專用本省兵勇人地自較熟習防務亦可經久惟須將領得人認真簡練耳欽奉初九日

寄諭飭將各省征軍撤回大河以南責令在防京兵及本省官兵

搜捕餘匪毋庸借撥客軍致多擾累似可無須留勇扼紮矣臣所部淮軍均係南人轉戰六七年去家數千里久役思歸本是人情若留駐北方開革告假往返不便米糧藥械接濟難常卽嚴爲約束而兵與民素不相習久亦未必相安臣不敢不總總慮也至皖省應留重兵並免查究前案一節英翰在皖年久熟諳民情所請於皖軍內挑留一萬二千人分作四枝選派將領分駐要地聯絡彈壓並請

明諭宣示凡捻逆未平以前所有爲匪之人已經投誠遣散一律准予自新不准該處紳團再行尋仇控殺地方官吏亦不得藉端苛求此後再有作奸犯科責成地方官嚴辦以安反側而遏亂萌實係因時制宜之策應請

敕下兩江督

臣

安徽撫

臣

遵照察度妥辦

臣

復查安徽之類毫宿

蒙江蘇之徐海山東之曹沂河南之歸汝各屬地界毗連風氣犷悍自古中原禍亂大率萌蘖於此捻匪起於蒙亳煽聚勾結徧及東豫擾攘數省今幸而撲滅散勇降眾惟皖徐豫東交界之人爲最多即使設法安插而民貧地瘠生計艱難勢不能人人得所目前兵威鎮懾斷不可少尤須地方大吏慎選嚴明廉惠之牧令加意教養認真緝捕安徽撫臣宜常駐潁壽一帶就近督察控制並懇

飭下江皖東豫各督撫曉諭交界各州縣圩寨團練照舊整理以期化莠爲良卽有滋事散勇零股馬賊亦不得逞志矣至崇厚奏稱弁勇有願西征聽其自行報名英翰奏稱西征宜專用一軍前往一節臣查陝甘回匪股數雖多皆係土著有巢穴室家之戀非輿捻各逆肆竄外省者可比辦法宜勦撫兼施逐漸措置左宗棠

前次而稱該處兵力尙非不足各營將弁自西來者僉謂不患戰之不勝而患無糧可購無水可飲是以雷正綰曹克忠楊岳斌等所部皆係勁旅終歸潰散鮑超所部亦屢調不前就現在情形而論左宗棠全軍盡留在陝卽甘境各軍不聞兵單只聞糧絀是其所急不在添兵而在濟餉與籌糧也自來西陲用兵遠或數十年近或十餘年而後定蓋屯田轉運均極迂遠非旦夕所能奏功該處民久乏糧至無民則何從覓食兵已乏食若添兵則徒以釀亂說者謂移得勝之師以圖大舉似是兵家常談而於西事利害得失之故未深究耳左宗棠老於軍事所部將弁必不乏人若有餉有糧隨地募練可得驍健勇丁斷不宜強調他軍轉難得力現在各營將領征戰多年甫經凱撤皆欲沐

朝廷寬大之恩乞假休息弁勇亦尙無報名願往者大抵將之於

帥弁勇之於將皆須恩信素孚忠奮易生廉頗思用趙人自昔爲然且用勇與用兵迥殊兵可互調而勇不可改調與其改調不如另募此行閒實在下情不敢稍有隱飾也以上三事爲善後大端微臣管見所及謹繕摺據實由驛覆陳伏乞

皇太后

皇上聖鑒訓示施行謹
奏

張總愚投水確實並各軍裁撤片

同治七年七月二十日

再逆首張總愚投水淹斃前據降人王雙孜口供錄呈在案旋又據豫軍張曜等解送續收降賊王結巴臣親加研訊亦在張總愚逃走八人之內所供與王雙孜相符是其投水伏誅毫無疑義是日全股殲除張逆亦斃嗣經各處搜捕並無實在匪蹤惟各營未撤游勇降眾混雜分民間不無驚擾自以撤軍安民爲最要豫軍宋慶張曜等已於十六日拔隊山臨清南樂一帶回豫長江提督黃翼升統帶各營水師並姚廣武所帶清淮水師均趁開河有水分起回南臣部各軍遵

旨卽令劉銘傳郭松林等陸續移撤由張秋渡河暫行分紮徐州濟甯周家口各要地以資鎮扼俟臣赴京

陛見南旋後會商曾國藩等籌補欠餉徐議裁併陳國瑞亦來德

州稟商撤遣臣爲者催江西浙江協餉飭該員一而妥爲資遣侍講學士袁保恆因臣處軍務已竣仍飭回京候補王萬釗所統勦軍駐防滄州減河准崇厚兩商暫留鎮守俟各軍還撤再令凱旋善慶溫德勒克西所部馬隊出征年久疲苦萬狀臣本允俟捻股蕩平卽行撤回臣經奏奉

俞旨茲奉初九日

寄諭飭該副都統管帶回京暫駐南苑已飭糧臺趕給餉項以便剋日起京惟善慶馬隊由豫省調來者向食豫餉積欠甚鉅臣咨緘撫臣李鶴年迅速解濟未知能應手否鹽山南皮慶雲一帶蹂躪最苦鹽梟素多此次投賊者雖殲斃不少將來客軍撤盡難保無土匪飢民乘閒搶劫應請飭下官文崇厚督飭地方官認真撫卹並酌派本省兵隊就近巡

緝以安良善而清亂源所有餘賊肅清各軍陸續凱撤及責成地方文武撫卹巡緝各緣由謹附片縷陳伏乞
聖鑒訓示謹
奏

劉秉璋乞病摺

同治七年七月二十四日

奏爲藩司患病籲懇開缺調理恭摺奏祈

聖鑒事竊山西布政使劉秉璋由咸豐庚申庶吉士授職編修同

治元年經臣於蘇撫任內

奏調軍營襄助一切二年統帶兵勇攻克福山海口賊巢援解常熟城圍旋收復浙江平湖乍浦嘉善海鹽各城三年會合各軍攻克嘉興湖州各府城淳升翰林院侍講詹事府庶子轉侍講學士五年春閒經曾國藩檄調統率所部赴東豫剿捻奏奉

諭旨襄辦軍務馳逐數省屢戰獲勝歷由江蘇臬司升山西藩司以統軍追剿並未赴任五年十一月觸冒風霜肝氣舊症復發六年正月請假調治維時任賴捻股竄擾鄂中勢甚猖獗臣方奉命接受

欽差大臣篆務勸令力疾督隊從征俾資熟手春夏之間由鄂而皖而豫而東逐日拔營操勞愈甚臣見其病體不能養息適與諸將定議就東境運河圍賊派該司督守運牆布置極為嚴密冬杪任賴等股殲除淨盡該司積受寒溼患病增劇據稱左腿筋骨酸痛不便乘騎臣因東南軍事稍定暫准給假醫調並將所部裁遣四營其餘馬步十一營遴派記名提督吳長慶接統本年二月檄調該軍北來隨同堵剿劉秉璋旋赴江皖一帶就醫茲據呈稱醫治數月屢服降氣和血之劑無如受病已深筋骨尙難舒和稍一煩擾夜不成眠據醫家云必須靜心調攝可冀復元請

奏懇開缺回籍調理等情前來臣查劉秉璋志行堅卓學識深遠以儒臣從事行閒淡於榮利與士卒最下者同甘苦治軍嚴整慮事精詳每遇艱危棘手之時其氣凝然不可撓奪臣方冀再加歷

練堪備

朝廷大用迺以積勞致病籲求開缺先後兩牘屢陳現值捻逆蕩平中原大定該藩司舊部弁勇已交吳長慶接帶並無經手未完事件擬如所請仰懇

聖恩俯准劉秉璋開缺回籍調理該司年力正強若攝養就痊必不自甘廢棄所遺山西布政使員缺緊要未便久曠職守應請旨迅賜簡放以專責成所有藩司患病籲懇開缺調理各緣由謹繕摺由驛具陳伏乞

皇太后

皇上聖鑒訓示謹

奏

請蠲免東南積欠錢糧

同治七年八月初四日

奏爲東南各省久受捻患籲懇

特恩蠲免積欠錢糧以廣

皇仁而蘇民困恭摺密陳仰祈

聖鑒事竊前因捻逆張總愚全股蕩平欽奉七月初二日

上諭捻逆自渡河北犯擾及河南直隸山東所屬各州縣焚燒擄掠慘不可言小民耕種失時流離轉徙各該處紳民猶能集團修寨奮勇殺賊保衛地方朝廷於矜憫之中尤深嘉尚除山西被擾各州縣應徵錢糧業經該撫奏請蠲緩外其直隸山東河南被賊各州縣著各督撫迅速查明分別擾害輕重情形奏請蠲緩錢糧等因欽此仰見

聖德如天拯民水火之至意凡直東紳民來營謁見臣宣布

恩旨無不感激零涕踴躍奮興惟捻逆擾亂中原閱十餘年歷七八省張總愚股匪自上年冬間始渡河北犯晉省祇一次經過河北直東僅數月蹂躪尙蒙我

皇太后

皇上憫念災黎

特沛恩施此卽感召天和馴致成功之所由來推此

仁心發爲仁政足爲億萬姓造無疆之福臣實不勝感幸伏查張總愚與任柱賴汝洸等股流竄安徽江蘇山東河南湖北等省最久且廣臣上年督師所過徐豫鄂東各交界祠園勒任賴等逆於運河以東凡該逆竄擾之區人煙寥落耕穫失時小民流析離居飢餓轉徙而死及被擄殺者不知凡幾傷心慘目之狀不忍見聞其有紳團築圩結寨自守官軍追至或賄給糧草或需導助陣迨

任柱殲斃賊黨屢敗則到處執梃橫矛截殺竄賊以洩積忿臣既

憫生靈之被劫民情之嚮義尤賴

聖朝深仁厚澤之感人者深也茲東西兩股藉各將帥之力悉就

削平無告窮民幸得稍舒喘息河朔直東一帶已蒙

恩分別蠲緩錢糧其皖徐東豫被擾最久地方似應一律蠲緩以
免向隅臣查任賴等股去冬剿滅淨盡本年各處業經開徵現在
餉需鉅迫自未便議緩新賦致有望礙其同治六年以前無歲不
徵亦無歲不欠實由捻氛未平民力不逮即使照例逐年帶徵徒
供吏胥之需索無裨帑項之實濟曠蕩之恩應出自

上可否仰邀

特旨將歷年被捻擾害最重之安徽之鳳潁泗江蘇之徐海山東
之曹濟青沂河南之開歸陳許汝光湖北之黃德各屬州縣同治

六年以前積欠錢糧概行豁免其餘被擾較輕各屬並

飭下各督撫查明分別請免舊欠以昭核實而示平允在

朝廷蠲積年之陳欠於正供所損無多在窮閭免無限之追呼於

元氣補助不少至陝西尙有回匪踞擾請俟該省軍務大定再行

核辦微臣管見所及是否有當伏乞

聖明采擇施行所有東南各省久被捻患籲懇

特恩各緣由謹繕摺由驛密陳仰祈

皇太后

皇上聖鑒訓示謹

奏

請體恤吉黑馬隊片

同治七年八月初四日

再欽奉

諭旨飭調善慶溫德勒克西所部馬隊回京聽候調撥臣遵飭各糧臺解給月餉俾作行資並催該副都統等迅速北上據報已於初二三日分起啟程惟查善慶所部吉林黑龍江馬隊不過千名出征十餘年疊經傷亡病故各起殘隊湊集只有此數溫德勒克西所部察哈爾馬隊亦傷亡過半今僅存三百餘名該兩軍勘揔最久馳逐最苦官兵思歸情迫久無關志去不經臣多方激勸允俟東揔剿滅立予凱撤迫任賴等股滅後西揔竄近畿疆疊奉

嚴旨飭調臣再四催逼該官兵勉強從征經臣將該軍困憊思家情形附摺奏明並奉正月間

寄諭侯張總愚擒股殲除卽准凱撤旋又奉六月間

諭旨俟滅賊後願回籍者准其回籍等因此次擒股蕩平該官兵
首先議撤適奉

旨調赴南苑各起兵將屢來臣處環跪泣求臣好言拊循激以大
義允爲切實奏懇

恩施該官兵始肯就道臣自咸豐初年從軍卽稔知東省馬兵驍
健無敵其人材多樸拙耐勞惟遠調南省水土不服地勢不習將
帥調度不盡得法軍興二十年羽林勁旅耗喪實多現存僅百分
之一殊堪矜憐臣自接辦剿擒以來每遇騎將勁兵不敢不曲加
護惜是以善慶溫德勒克西及所部官兵人數雖少均願爲臣出
死力任往張總愚兩股皆滅於大寒盛暑之時此起馬隊追剿尤
力足振

國威今調赴

南苑挑留備用原係根本至計惟該官兵艱苦下情實臣所素知而深憫者奚忍壅於上

聞吉林黑龍江黃旗馬隊兵雖不多戰陣得力可否俟到京後酌令暫行凱撤或一二年後再按該官兵名冊揀調襄作士氣而收實用至察哈爾馬兵得力較次似可無庸留營杭州副都統善慶出征年久家有老母漢軍副都統溫德勒克西亦從征十七年苦求歸省該二員均籍隸黑龍江樸實善戰可否給假回籍數月再行調出以示格外體恤統祈

敕下神機營王大臣察核奏辦施行伏乞

聖鑒訓示謹附片據實具

奏

餘贖軍米賑撫災黎片

同治七年八月初四日

再臣部各軍向食米糧今春奉調北援疊經咨商崇厚等籌撥漕糧及閩省船政大臣沈葆楨購運米石源源接濟茲捻氛肅清各軍陸續凱撤德州存倉軍米及天津轉運局甫經解到粳米計尙餘贖二萬七千九百七十四石一斗零久儲旣虞霉變運回徒費腳價莫如就近賑撫災黎以爲涓滴之助查運河以東武定濟南各屬縣被兵最苦荼毒最深聞東省因餉需繁鉅未能另籌撫卹臣已將前項軍米儘數撥交德州知州趙新驗收適丁寶楨委令濟南府知府龔易圖前來查災卽札飭該府察酌被擾地方情形分別被災輕重妥議均勻攤放由各州縣自行赴領會督紳董核實散給貧苦災戶不准假手吏胥並咨請撫臣督飭妥辦以期推廣

皇仁稍甦民困所有餘贍軍米就近賑卹東省災民各緣由理合
附片陳明伏乞

聖鑒謹

奏

東捻肅清彙案請獎摺

同治七年八月初四日

奏爲上年任賴捻股一律肅清查明臣部馬步各軍歷在皖鄂豫東蘇五省轉戰出力員弁兵勇及調防淮河運河長江諸水師併各處團練後路籌餉轉運累著績人員遵

旨分案列保仰祈

聖鑒事竊同治四年四月以後曾國藩接辦剿捻軍務卽調淮勇銘字鼎字盛字樹字勳字武毅等軍渡江北征爲四鎮六游之局分防追剿馳驅已歷年餘又檄催劉秉璋李昭慶各起馬步會合堵剿出入東豫皖鄂來往數千里大小百餘戰寒暑飢渴無稍休息其時長江提臣黃翼升所部水師遵調由洪澤湖入淮由清江入運分布巡防藉壯聲勢五年冬月逆首任柱賴汶洸與張總愚東西分股賊燄愈張臣奉

命接受帥篆仍就原部將士竭蹶經營上年五月任賴等逆出鄂後由豫入東人馬十餘萬剽突異常縱橫莫制臣會商鄂皖豫東各督撫通力合作調集水陸諸軍聯守運西圍築長牆上下千數百里節節布置該逆不敢繞越一步既畫地蹙賊臣卽併劉銘傳等軍爲三大枝專意游擊數月之間前截後追惡戰十數次任柱伏誅逆勢瓦解自壽光瀾河大捷死黨殆盡僅賴汶洸率殘匪數千乘夜山六塘河南遁仰賴

天威卒擒賴逆不使一賊漏網東南各省從此肅清軍士馳逐之苦轉戰之久固十倍尋常矣而後路籌餉之艱難轉運之迂遠製造之窮極工巧采辦之急迫接濟皆出力多年裨助大局仰蒙聖慈恩准分案彙保當卽恭錄行知去後茲據各統領各臺局核實開單請奏前來伏查潘鼎新周盛波等軍前此疊獲勝仗奉

旨准其彙案專保臣愧勦擒未有成效卽以迅速圖功一概併入肅清案內從優請獎計前後三年各營馳驅用命未獲獎勵幸而勦平東股今年得渡河專辦西擒略無回顧牽掣之虞誠不可不示以激勸除劉銘傳一軍業將楚北東蘇四次彙保奏奉

恩准外臣今分別酌核彙列各軍出力文武員弁清單爲第一案歷年水師出入東皖各河屢扼竄路去秋運防成後無論何處有急卽分撥馳援迨賴逆由六塘走淮揚不致遠竄實水師之功居多今分列水師清單爲第二案各處團練紳董附之從來軍心之安定視餉源之盈虛爲強弱甯皖蘇滬各局皆爲前敵養命之源五年十一月欽奉

諭旨籌餉與勦匪之功均爲國家倚重自是曾國藩維持後路督率司道嚴飭上下江局卡實心籌辦恤商濟軍源源不匱而淮軍

得力向以鎗械制勝數年來各局仿製外洋軍火鎗礮精益求精
臨敵得用今分列籌餉製造清軍爲第三案後路糧臺所解糧餉
軍火皆至清江而止由清江而西則由洪澤湖而正陽關換船再
至河南周家口分運各處由清江而北分解徐州濟甯再接運各
營風波之險道途之阻裝運火器子藥時時有性命之虞各委員
皆能踴躍從公無誤要需前年皖鄂上年東蘇戰士常苦飢疲非
四路采辦不爲功冒險購解其勞勛有不堪言狀者今分列轉運
采辦清軍爲第四案綜計之似人數過多分核之實皆勞績足錄
可否仰懇

聖恩均從優照准所請以示鼓勵除千總以下各弁及六品藍翎
等項循案造冊咨部核准外所有查明上年任賴捻股肅清馬步
各軍歷在皖鄂豫東蘇出力員弁兵勇及水師團練籌餉轉運人

員分案彙保緣由謹分繕清單恭摺由驛具陳伏乞
皇太后

皇上聖鑒訓示謹
奏

奏保倪文蔚片

同治七年八月初四日

再花翎郎中銜刑部候補主事倪文蔚咸豐二年進士由庶吉士散館到部同治元年經前湖北撫臣嚴樹森奏保范泰亨倪文蔚李宗義等三員請以道員留鄂補用奉

旨著交官文嚴樹森差遣委用該員到鄂委辦營務時值金陵未復鄂省赴援之師及本省防軍悉心綜理鉅細必親三年督臣官文出省防剿疊著勤勞江南既平該員亦假歸授徒不求仕進及臣補授楚督因該員練習軍務又係交鄂差委之員調至行營襄助一切該員學行純粹器識深現幸中原肅清所有在事出力員弁均邀獎敘該員始終兵事備歷艱苦未進一階而仍身不擇勞口不言祿功績久已眾著廉讓實爲可風若蒙恩量予超擢當卓然有所樹立應如何獎勵之處臣未便擅擬出

自

聖主逾格恩施謹附片具陳伏乞

聖鑒訓示謹

奏

皇太后

皇上聖鑒謹

奏

請修曲阜孔廟片

同治七年八月初八日

再山左爲聖賢桑梓之邦十餘年閒捻匪會匪蹂躪殆遍莒兩府尤屬捻匪出入衝途臣上年駐師濟甯距曲阜僅九十里東捻肅清以後親率僚屬祇謁

孔林瞻仰

聖廟榱桷剝落丹漆黯然尼山書院鞠爲茂草愍焉傷懷詢之衍聖公臣孔祥珂據稱軍興以來屯產荒廢入款不敷歲修久輟屢次估工皆因經費無出而止臣維弭亂之道以倡明正學爲先東民居近聖里被澤尤深年來兩次平捻均在東境臣方以貽害偏隅爲憂凡築牆濬濠借用民力之處諭以大義無不樂從各處紳團捐助糧草協剿竄賊亦甚踴躍以此見民心大可恃而聖教之推廣也曲阜

孔廟實爲我

朝重道崇儒根本之地自應及時修葺俾壯觀瞻前年大學士兩江督臣曾國藩督師過謁曾倡此論比以軍務倥傯未遑定議臣謹查

林廟各工多有坍塌一律興繕需款浩繁目前財力實不能逮惟大成殿九間檐宇脫折久之必有傾塌之虞擬請

飭下兩江湖廣督臣於該省撤軍就緒後各速籌銀二萬兩彙解山東並由山東撫臣在本省籌銀二萬兩遵派妥員鳩工庀材擇要興修務期輪奐維新以仰副

皇上假武修文之至意謹附片具

奏

會籌分別遣留各軍摺

同治七年十一月初十日

奏爲會籌大局分別遣撤留防各軍恭摺仰祈

聖鑒事竊臣鴻章於

陞辭後南旋經過德州將吳長慶所部並親兵各營督帶過河順
往張秋察看劉盛藻銘軍分防布置情形尙爲嚴整卽由濟甯徐
州宿遷一路接見各統領飭將弁勇久役思歸者補給欠餉先行
陸續遣散計劉銘傳銘軍裁遣馬隊一營潘鼎新鼎軍裁遣馬隊
三營步隊八營郭松林武毅軍裁遣馬隊七營步隊十營周盛傳
盛軍裁遣馬隊二營唐仁廉裁遣馬隊三營張樹屏樹字步隊三
營全行撤遣已故提督楊鼎勳所部勳軍由滄州減河撤回現飭
營務處道員段喆會同王萬釗等裁遣勳字馬隊三營步隊十營
合共遣撤馬步隊五十營勇夫已踰三萬人臣於十月二十六日

馳抵江甯省城會商曾國藩等通籌大局僉以淮勇只可酌裁不
可盡撤中原及東南各省粵捻諸逆擾攘幾二十年費無數人力
財力艱苦經營始克奏功臣身在局中極知挽回之不易矣現在
用兵甫靖省分降眾散勇無業可歸會匪游民到處勾結徒以懾
於軍威不敢妄動亂機之來往往起於微而乘於忽若不稍留勁
旅以資鎮壓一有警變召募遠調均趕不及必將不可收拾惜日
前之小費忘日後之巨忠臣等何敢出此茲公同酌定銘軍馬步
人數較多紀律素嚴暫令臬司劉盛藻統帶駐紮河北東昌張秋
一帶曾國藩以直隸練軍尙未定議北路不宜太空俟履任有期
當再察酌調遣濟甯居南北要衝潘鼎新所部僅留七營兩哨駐
防該藩司到任後隨時稟商山東撫臣相機酌辦江蘇徐州昆連
東皖豫邊界土匪出沒無常最爲重鎮除該鎮弁兵分汛巡防並

馬步勇隊四營仍嫌單薄擬暫留提督吳長慶步勇八營馬隊三營擇要駐扼會同徐州鎮道協力妥辦又蘇境沿江千餘里伏莽殊多空虛尤甚擬令道員段詰俟撤遣就緒帶勦字五營擇要移駐與長江水師聯絡巡緝稍壯聲威金陵爲東南關鍵城大兵單現經會國藩留湘勇星豫三營駐防城內臣鴻章擬留總兵劉玉龍開花礮隊一營仍紮下關江口均交臣新貽等酌量調遣臣鴻章將赴湖廣本任該省居上游四戰之地游匪肆行防勇尙未盡撤非帶親軍前往難資鈐制擬將提督郭松林裁撤步隊五營總兵周盛傳裁撤步隊九營馬隊三營並親兵鎗礮隊二營調令隨去以便汰弱留強如將來江皖稍有蠢動卽調回策應以顧全局以上留防各軍臣等再三籌議按時度勢因地制宜誠屬必不可少餉需已漸節省除潘鼎新所部月餉向由山東解濟現以本省

藩司裁贖之軍留防本境應請

旨仍飭東省酌減籌濟其餘各營本食蘇餉應由蘇省分別籌解
接濟仍由臣等隨時會商妥酌俟各路游勇斂跡邊患漸紓地方
可臻奠固再行次第撤裁似於南北善後大局較為穩慎臣國藩
晤商定議後於十一月初四日起程北上屬臣等會銜繕疏所有
分別遣撤留防各軍緣由謹會同大學士調任直隸督臣曾國藩
合詞恭摺由驛具陳伏乞

皇太后

皇上聖鑒訓示謹

奏

徐邦道請注銷處分片

同治七年十一月十一日

再記名提督徐邦道前由副將在四川本籍遵調帶勇赴陝頗著戰功同治二年於失守漢中案內經前陝西撫臣劉蓉奏參嗣即投效江蘇軍營隨期浙閩每戰必克經臣於克復湖漳案內奏保開復原官留於四川補用旋准部咨行查該將失守處分其時臣營勦捻喫緊該將帶隊前敵正資得力當即嚴飭續立戰績准爲陳請開復嗣游擊豫東各處勇往殺賊極知感奮上年十一月隨同擊斃逆首任桂經臣隨摺奏保總兵本年五月遵保銘軍出力案內續請以提督

記名簡放均蒙

諭旨照准惟被參之案未定恐懸保之階仍懸臣查漢中失守時該營先未淪陷實因賊眾圍久援軍潰敗所致其情尙有可原而

自到臣營轉戰數省勦平東西二捻功績最多尤足贖前愆而責
後效可否仰懇

聖恩

飭部將徐邦道前此革職摺開處分注銷准照疊次保案以提鎮
簡放出白

逾格恩施謹附片具陳伏乞

聖鑒訓示謹

奏

請假歸墓省親片

同治七年十一月初十日

再臣自咸豐八年由皖北軍營調往曾國藩江西軍次是年秋間臣原籍合肥縣被賊陷踞先入敝廬焚燬一空惟墳墓幸尙無恙臣羈身戎事馳驅南北忽忽十餘年未獲一親祭掃松楸霜露瞻念泣然又臣母年已七十寄寓安慶因臣凱旋在即望切倚闕今臣自江甯赴鄂派流而上由廬至皖均尙順道可否籲懇

天恩俯准賞假一箇月俾臣就便由廬州埽墓安慶省親藉軍旅之休暇遂爲鳥之私情感沐

鴻慈尚有既極近來遣散各營弁勇多係皖人聞俱安靜回籍當隨時會商地方官妥爲安插臣俟江省經手事件會同督撫臣商榷料理竣有頭緒即便起程理合附片陳請伏乞

皇太后

皇上聖鑒訓示謹
奏

李文忠公文稿卷十四